

1 Timoti

Timoti hitte hanƙapya Pol beɓeɓ asanƙ kayyɓ

1 ¹Timoti, nebe Pol. Nebe neɓ gayen mata bulunƙe mat Dumulgan teɓ teɓ Alniniɓ Al Kurunƙ beɓeɓ, “Yesu Kristuyen mere basanƙ al hawayɓ,” ninyɓ. Irde kame wayyeyen yey doyanƙ irde hite al Yesu Kristu gore wor yingende mere basanƙ al niryɓ geb, gago ge niɓ asanƙ kanƙ hime. ²Gebe Al Kurunƙ niɓ saba girde himeke kenƙela po gama irde hayen goke teɓbe urne nigen wor po yey nurde guney himyen.

Ningeb nebe Nanniniɓ Al Kurunƙya Kurunƙniniɓ Yesu Kristuya beɓeɓ ge goyen bunineɓ girde igiɓ igiɓ girke beɓe kamke igiɓ po hiwonƙ yey gusunƙanƙ yirde hime.

Usi saba mar utanƙ yirayɓ

³⁻⁴Be, gebe nurde ha gwahade po Efesus taunde gor niɓ Yesu gama irde hanƙ mar kurabe Al Kurunƙyen mere teɓ bulunƙ mat saba teɓ hanƙ. Irde yingende tikulaya asem yagot deɓeya asande katiɓ kurunƙ goyen goke po dufay heɓ tagalde hanƙyen. Irdeb al faranƙ yurke Al Kurunƙ niɓ hekkeɓ nurtekdebe ɓakɓak teɓ kadam mohanƙe teɓ hanƙ. Goke teɓbe saba bulunƙ yirde hanƙ mar goyen utanƙ yirayɓ yeybe Masedonia nanare kwe yeyya Efesus gor po hayiɓ ginmiriɓ goyen gago sopte ginhem.

⁵Go mar goyen utanƙ yirkeɓ bada po henayɓ. Irkeɓ alya bereyabe usi saba goyen yubul teɓbe biɓde dufay hoyanƙ miɓmonƙ hinayɓ. Irde biɓde wukkeɓ wor po nurde Al Kurunƙ niɓ fudinde wor po hekkeɓ nurnayɓ. Gwaha teɓbe al hoyanƙya Al Kurunƙya niɓ po amaney nurde hinayɓ. Goke teɓbe gago gineɓ hime. ⁶Gega al kurabe mata igiɓ niɓ go wa ginhem goyen gama yirhet yeybe sonƙ heɓ mere miɓ miɓmonƙ goyen teɓ hanƙ. ⁷Go mar gobe Al Kurunƙ beɓeɓ mata igiɓ kiriɓ goyen basanƙ heɓ tagal tagal mar hetewonƙ yey nurde yingende dufaymiɓ tagalde hanƙ. Irde “Dufayniniɓbe fudinde wor po,” yey nurde al saba yirde hanƙ. Gega Al

Kurun belen mere kiriyin min goyen kenkela ma bebak ten han geb, “Min gwahade nin tagalde saba yirhet,” yen ma nurdeya ten han.

⁸Be, Al Kurun belen gama irnayin yen saba kiriyin goyen min kenkela bebak tenya gama irde hitekbe saba gore igin diryen yen nurde hite.

⁹Al Kurunyen sababe meremin kenkela gama irde hanjen mar goke ma kiriyin yen nurde hite gogo. Saba gobe Al Kurunyen mere pel irde han mar, asogo irde han mar, palap ma irde han mar, mata bulun ten han maryabe Al Kurun dilingde wukken ma han mar goke saba goyen kiriyin. Kurabe megen nin mata nin dufay kurun po hen han mar, nani minig gasa yirke kamde han mar, al gasa yirke kamde kamde mar, ¹⁰al berem yan belen bere hoyanya duwan ten ten mar, irdeb al yingen ulin gabu irde bere wor yingen ulin gabu irde ire unyat mata ten han mar, al belen al kawe ten yuku al hoyan yunenbe gote murungem yawarde han mar, usi mar, kadom bulun yirnin yenbe mere yerd yunen han maryabe, al kura mere Yesu nin yitin gote saba pel irde han mar kurun gwahade goke manan kiriyin. ¹¹Saba fudinde gobe Yesu nin yitin mere bana gon hi. Yesu nin yitin mere gobe turun irde hityen al Al Kurun gore tagalde tukayin ninenbe nunyin. Ningeb Yesu nin yitin mere gobe Al Kurun belen det kurun wor po yen nurde hi geb, tonjen yan wor po yen nurde hime.

Al Kurunyen meten tiyayin

¹²⁻¹⁴Be, bikken nebe Yesu Kristu goyen Al Kurun Urmin yen ma nurdeb ne harhem harhem tenbe Yesu Kristu nin bulun nurd unen karan urde yende alya bereya merere yerde yad fere ten hinhem. Yen gama irde hinhan mar goyen gasa yirde bulun wor po yirde hinhem. Gega goyenterbe Yesu Kristu nin bebak ma ten hinhem geb, “Yenbe Al Kurun urmin,” yen hinhan goyen usi ten han yen nurdeb mata gogo ten hinhem. Ningeb Doyan Al Kurunnin Yesu Kristu belen buniyen wor po nirdeb igin igin nirke bene hekbe yen hitte po hinhin. Irde bener mat wor po yen ge amanen nurde hinhem. Goyenbe gwahade hinhem gobe Yesu belen buniyen nirdeb faran nurke gwahade hinhem gogo. Irkeb yen belen ne ninbe, “Fudinde wor po metenne tiyyen,” yen nurdeb basin nirde tare niryin. Ningeb goyen goke tenbe igin nurd unen hime.

¹⁵Be, nen tumnan fudinde yen nurtek mere kura momon giren tihim. Mere gobe gahade: Yesu Kristube alya bereya mata bulun bana han mar goyen yumulgan tiyen yen megen gar katiyin. Ne wor mata bulun bana po hinhem. Mata bulunnebe kurun wor po, al hoyan gote folek wor po.

¹⁶Gega ne al bulun wor po gahade gayen wor Yesu Kristuyen buniyen bana hokoyan himirin. Gogab ne gayen mata bulunde mat mulgan hiyyen yen Yesu Kristu belen doyan hen hen ge pinen ma hen hinhin goyen kame alya bereya belen nurdeb, “Nen wor igin, Pol iryin gwahade diryen,” yen nurdeb Yesu nin dufaymin sanin irde Al Kurunya huginen

hinayin. ¹⁷Ningeb goke tenbe Doyan Al Kuruninin huginen palap irde degem turun yan irde hitek. Yenbe epte ma dilyninde kentek, irde kamde kamde minmon gwahader hiyen al.

¹⁸Dirigne Timoti, saba girde hime gabe bikken Al Kurunyen meten mar belen gabu irde Al Kurunyen tarende guram girde sanin girde henryabe Al Kurun belen ge nin yen meremin yunke basan hen momon giramin goyen hende huwarde gago saba girde hime. Gogab sabane gayen gama irde fulen igin po ten hitin al yara hen megen nin mata bulun kurun goyen fole ird ird nin kurut wor po yen hayin. ¹⁹Goyenbe fulen goyen ten henryabe mali ma ten hayin. Al Kurun nin hekken nurtek dufay goyen taren po tanarde ga fulen ten hayin. Irde beger wukken wor po nurdeya fulen goyen ten hayin. Goyenpoga al kurabe saba igin gobe temeyamin. Go mar gobe kuwe galan yen nernor irtin yara teban sope yirtek mon go gwahade goyen hamin. ²⁰Go mar goyen kurabe Himeneusya Aleksandaya. Irem gobe mata bulun gwahade po ten hikeb Yesuyen alya bereya bana mat yakira timeke Satanyen yufukde har. Gogab Al Kurun sukal irde haryen mata goyen bulun ten har yen bebak ten bada hiriryen.

Al Kurunya mere ten ten mata

2 ¹Ningeb ginhem gwahade po ten henryabe ge belen doyan yirde hayen mar goyen Al Kurunyen dirnen wenbe gwaha mat hinayin yen saba yirde hayin. Saba gobe gahade: Al Kurunya mere ten ten gobe det kurun wor po geb, Al Kurunya mere ten ten mata ten hinayin. Irde al kura det kuran kanduknen nurde hinayin mar nin Al Kurun gusunan irde hinayin. Irde Al Kurun belen al hoyan manan tumnan faran yuri yenbe Al Kurun mere irde henya goke gusunan irde hinayin. Gwaha ten henryabe Al Kurun belen wol hen dunyen yen Al Kurun igin nurd unen hinayin. ²Al faran yuri yen gusunan irde henryabe megen nin doyan mar karkuwanya nanamde nin doyan marya goke bin sir ma yen hinayin. Gogab doyan mar gore kenkela doyan yirke Al Kurun palap irtek mata ten dilingde wukken hen hen nin kanduknen ma nurde bin kamke igin po hinayin. ³Nen gayen Dumulgan ten ten Alninin Al Kurun goyen gwahade mere irde hinayinbe yen belen igin denen aman hen hiyen. ⁴Yenbe al tumnan yumulgan timeke mere fudinde goyen kenkela bebak tiwon yen nurde hi. ⁵⁻⁶Gobe Al Kurun yen po gab alya bereya megen han kurun gate Al Kurun. Hoyan kura hi minmon geb, gogo gwahade nurde hi. Gega go mar gobe tumnan ala harhok unenbe bulun po hamin. Irkeb Yesu Kristu belen megen han mar go tumnan kanduk bulun wor po yentek heke yenenbe gasunmin ten kamdebe go mar go sopte Al Kurunya awalikde hitek belen kerd yunyin. Go mata gobe al hoyan kura belen ma tiyyin. Yesu Kristu yen unken po meten go tiyyin. Yenbe Al Kurun belen bikken nalu kiryin goyenterbe gogo kamde Al Kurun belen al

yumulgan tiyen yeq dufaymin kiriyin goyen kawan iriyin. ⁷Ningeb goyen goke tenbe Yesu belen, “Ne nin tagalde hayin,” ninenbe mere basan almin niriyin. Usi ma girde hime, fudinde wor po ginen hime. Nebe Yesu belen, “Yuda mar mon al min hoyan goyen saba yirde hike dufaymin Al Kurun nin sanjin irde yende mere goyen fudinde yeq nurde gama irnaying,” yeq basina niriyin.

Alya bereya Yesu gama irde han marte mata

⁸Be, mere gabe al dirin geya han mar goke po tagalen tihim geb, momon yirayin. Be, go mar gobe hinayin kurun goyenbe Al Kurun mere irdeya ga hinayin. Goyenbe mere irnin yeqbe dufaymin Al Kurun dilingde wukken po heya mere irde hinayin. Bearar ten kadam mohonde tenya Al Kurun mere irde hinayin gobe Al Kurun dilingde min minmon. Goke tenbe mata bulun gwahade gob yubul po ten gab Al Kurun mere irde hinayin.

⁹Be, bere nin wor tagalen tihim. Berebe ulin umna tinin yeq goya kalyayya kalyuyya damum hende wor po gore ma umna ten, amil damum hende wor po ma hor yirde hinayin. Irde umna mormok, al dufaymin bulun yirtek umna goyen ma ten hinayin. Tona wor yentek igin mon mat matam matam ma yirde hinayin. Gwahade ningeb umna tinin yeqbe umna kenkelak po ten hinayin. Irkeb alya bereya belen yenenbe bere igin, dufaymin bulun mon yeq nurde yunen hinayin. ¹⁰Ningeb Al Kurun palap irde han mar berebe ulin umna nin ug po ma dufay henayin. Gwaha titjenbe mata igin ten hinayin. Gobe tone umna yirtin yara nurde hime.

¹¹Be, berer saba kurabe gahade: berebe doyan marmin belen saba yirke kaknar ma ten balmin henbe gama yirde hinayin. ¹²Irde alya bereya gabu irde hande gor epte ma al saba yirde hinayin. Irde epte ma al doyan yirde hinayin. Bere belen mata gwahade ten ten gobe ne belen utan yirde hime. Berebe alya bereya gabu irde hande gor dufayminde mali mere ma ten hinayin, balmin po hinayin. ¹³Gobe Al Kurun belen han kapyabe Adam wa iryin irde Ewabe kame ga iryin geb gago yeq hime. ¹⁴Irde bere wa Satanyen usi nurdeb Al Kurunyen mere ma gama irde mata bulun tiyyin. Adam mon. Ningeb goke tenbe gago yeq hime. ¹⁵Berebe Al Kurun nin hekken nurde, kadam ge amanen nurde hinayin. Irde dufay bulun bulun fole irdeb megen nin marte mata bulun ma ten Al Kurun dilingde wukken hinayin. Mata igin gwahade goyen bada ma hen goyen po ten hinayinbe Al Kurun belen bere irdeya, “Berebe alen faran mar henayin, irde dirin besa yirde hinayin,” yirin goyen kenkela gama irde han yeq nurde yunen hiyen.

Yesu gama irde han marte doyan mar

3 ¹Be, gabe Yesuyen alya bereyat doyan mar nin tagalen tihim. Be, “Yesuyen alya bereya sios doyan ird ird meten titek irde hi albe igin

mat po meten titek yen nurde hiyen,” yen hanjen. Mere gobe fudinde. ²Ningeb al kura doyan al hewe yenbe mata bulun yubul ten hiyen. Irkeb al belen tagal ma unen hinayin. Gwaha tiye yenbe al berem yanbe berem unken go po hiyen. Yenbe bemel bearar minmon, irde ulinde po hapek yan nurtek dufay fole irtek hiyen. Irde al belen palap irtek mata po ten hiyen. Yenbe al gargar mata minyan. Irde al kenkela saba yird yird dufay minyan hiyen. ³Al gobe kukuwa fe nene kukuwa hen hen mata ma ten hiyen, det kuran ten kwep kwep ten al mali ma gasa yirde hiyen, diling kamke balmin hiyen. Kadomya hinginhangen ma ten hiyen, dufaymin hora nin po ma nurde hiyen. ⁴⁻⁵Irde yenbe dirinminmin kenkela doyan yird yird mata ma nuryenbe Al Kurunyen dirnen wen manan epte ma kenkela doyan yirde hiyen geb, dirinminmin doyan yird yird mata goyen nurde kenkela doyan yirde hiyen. Irkeb dirinmin manan nanin palap irde meremin nurde hinayin. ⁶Irde gayamun ga Yesu gama irde hi al gore epte ma aran po doyan al hiyyen. Monjo Satan belen usi irke ne harhem harhem tikeb Al Kurun belen Ungura takira tiyyin gwahade goyen po al goyen wor takira tiyyen. ⁷Be, al kura doyan al hewe yiyyen al gobe mata igin po ten hiyen. Irkeb alya bereya Al Kurun ma nurd unen han mar gore wor turun irde hinayin. Monjo Satan belen usi irke mata bulun tikeb doyan al gote denem bulun hiyyen. Metenmin manan bulun hiyyen.

⁸Be, gwahade goyen po doyan marte faran marmin manan ulinde merem mon po henbe al belen palap yirtek mata po ten hinayin. Irdeb melak kalpan ma hinayin. Kukuwa fe netek netek ma yirde hiyen. Usi matare ma hora yade hinayin. ⁹Yenbe Al Kurunyen mere al mali belen bebak titek mon goyen Al Kurun belen bebak yirke binde wukken wor po nurdeb Yesu nin dufaymin taren ird ird mata gote saba goyen taren po tanarde hinayin. ¹⁰Ningeb doyan marte faran mar yirnin yenbe matamin yago goyen yenkela hen ulinde merem mon yenen gab meten goyen yunen hinayin. ¹¹⁻¹²Irde yen manan berebe unken po yawarnayin. Irde dirinmin kenkela saba yirke yende mere nurde hinayin. Gwahade goyen po berem yago manan alya bereya belen palap yirtek mata po ten hinayin. Gwaha ten henya kadam yiya girde ma ten hinayin, bemel bearar ma ten hinayin. Irde mereya mataya ten hinayin kurun gobe fudinde binde mat po ten hinayin. Irke alya bereya belen dende mereya matayabe fudinde yen nurde hinayin. ¹³Be, Al Kurun nin meten ten hinayin mar goyen saba kurun yirde hime gayen kenkela nurde goyen gama irde igin mat po meten ten hinayin. Gwaha ten hikeb alya bereya belen amanen nurdeb palap yirde hinayin. Irkeb meten mar go goyen yenenbe, “Fudinde wor po, Yesu Kristube nenya hen faran durde hi geb, al belen gwaha dirde han gogo,” yen nurdeb Al Kurunyen meten epte titek yen nurde hinayin.

¹⁴Be, Yesu gama irde han marte matabe gwahade geb, gwahade goyen po geya han mar goyen saba yirde hayin yen asan gayen kan gunen

henyabe dufayner arañen po kuñ genmewon yen nurde hime. ¹⁵Gega aran ma kuñ forok yemekeb merene asañde hi gayen keneñbe Al Kurunyen dirnen wenbe gwaha mat hinayin yen nurdeb saba yirde hayin. Be, Al Kurunbe gwahader hitin, irde yende dirnen wen Yesuyen alya bereya sios goyen gayenter manan doyan yirde hi. Munan sios gobe Yesu nin yitin mere fudinde goyen kenkela po nurde gama irke mere fudinde gobe sanin po hekeb al hoyan beleñ epte ma bulun irnayin. ¹⁶Fudinde wor po, Yesu nin yitin mere gobe al mali mali beleñ bebak titek mon. Al Kurun beleñ faran yurke gab igin bebak tinayin. Be, Yesu nin yitin mere minbe gahade:

Yesu Kristube Al Kurunyen dufay gama irde bere binde forok yen kawan hirin.

Holi Spirit beleñ yenbe Al Kurun Urmin wor po yen yikala yiryn. Al Kurunyen miyon wor Yesu kamtinde mat huwaryin goyen kenamin.

Irkeb Nanin hitte mulgan hen hurkunbe denem turun yan wor po hirin.

Ningeb yen gama irde hinhan mar beleñ tagalde tukukeb megen nin mar beleñ go nurdeb gor mat po dufaymin yen ge tareñ iramin.

Be, mere gabe Yesu gama irde han mar beleñ kenkela po nurde gama irde hinayin.

Usi saba maryen saba

4 ¹Gega bikken Holi Spirit beleñ gaha yirin: “Kame kame Yesu gama irde hinayin mar kurabe Yesu nin dufaymin tareñ irtin goyen tubul tenbe ungunrayen usi mere tagalde han marte mere goyen po nurde, sabamin bulun goyen po gama irde beleñ fudinde wor po gobe son henayin,” yeke nurmirin geb, gago mata go forok yekeb nen tumnan bininin bak yan. ²Usi saba mar gobe al ulin kamtin kura kak isike ma nuryen go gwahade goyen po, dufay bulun beleñ po ulin kurun go mayde pasi hitin geb, usi mere ten hinayin goyenbe, igin tihit tihit po ten hinayin. Irkeb yenenminbe saba fudinde tagalde han yara gega usi ten hinayin. ³⁻⁵Go mar gote sabamin kurabe gahade: “Al beleñ bere yad yad mata bisam irde, bing kurabe nen goya ma,” yen hanjen. Gega det buda kurun Al Kurun beleñ yiryn gobe yingen, “Igin,” yirin. Irde Al Kurun dirnen wen beleñ det kura yawarnayin goyen yen beleñ guram yiri yen gusunan irkeb yen dilingde wukken ala po henayin geb, det megen han kurun gayenbe igin ala po, irde det kurun gake igin nurd unen hinayinbe bisam irtek det minmon wor po. Ningeb usi saba mar gore bing bisam irtin go manan Al Kurun beleñ yiryn geb, saba fudinde po nurde gama irde han marbe bing go neteke Al Kurun dilingde bulun dinyen yen ma nurde hinayin. Gwaha titnenbe Al Kurun beleñ bing yiryn goyen goke igin nurde unen ga nene hinayin.

Yesuyen metenj al igin

⁶Be, ne belen ginhem kurun gayen basan hej Yesu gama irde hanj mar momon yirayin. Goyenbe gigen wor gwaha tenj henjabe Al Kurun nin hekken nurd nurd mereya saba igin gigen gama irde hayen goya goyen sanjin po yanarde hayin. Gwaha tenj hayinbe Yesu Kristuyen metenj al igin hawayin. ⁷Irde ungurayen usi baranya megen nin baran min minmon goyen go ma po yenen hayin. Gwaha titjenbe Al Kurun palap ird ird mata tenj tenj nin po kurut yen hayin. ⁸Gwaha tenj hayin gab hayin kurun gobe igin po hayin. Igin hej hej gobe Al Kurun belen gwaha tenj hinayin mar yunen yirin gote murungem geb hubu ma hiyyen. Ningeb gar ha gayenter, irde kame Al Kurunyen gasunde hayinya wor hubu ma hiyyen. Goyenpoga al megen henja darim ugala yirde ulinde taren po hanjen gobe hubu hiyyen. Megen gar hanj gayenter po ulinde taren hinayin. Gega kamnayinbe goyare po taren gobe hubu hiyyen. ⁹⁻¹⁰Nenbe fudinde wor po Al Kurun gwahader hitin gore huwak hej hej gote murungem dunyen yen nurde hityen. Ningeb goyen goke tenbe huwak hej hej nin kurut wor po yen hityen. Kurareb goke kanduk yenen hityen gega, bada ma hej hityen. Ningeb huwak hej hej nin ginhem gobe fudinde wor po geb, mere go nurnayin mar manan gwahade po dufay hej hinayin. Gwaha diryen al Al kurunbe alya bereya mata bulun bana hanj mar tumnan goke Urmin Yesu tenj kerke katyin. Gega yenbe alya bereya kura Yesu nin dufaymin taren irde hanj mar goyen mun po yade hi gobe nurde ha gogo.

¹¹Be, mere girde hime kurun gayenbe geya hanj mar goyen kenkela po momon yirde saba yirde hayin. Bada ma hawayin. ¹²Irdeb gebe al fonen gega, goke tenj al hoyan belen palap ma girtek mata ma tenj hayin. Ningeb mere tenj hayin, mata tenj hayin gobe igin mat po tenj hayin. Irde al hoyan nin amanen nurde hayin, Al Kurun nin bege hekken po nurde hayin, irde mata huwak bulun minmon po tenj hayin. Gogab geya hanj mar belen mata tenj hayin goyen genenbe yen wor ge po gama girde hinayin.

¹³Munan nebe geya ma har. Goyenpoga gebe Al Kurunyen mere kapyan hej yunenbe mere min kenkela pitik irde saba yirdeb mere goyen gama yirde hinayin yen tagalde hayin. Irde ne ge hitte kun kun nin doyan henjabe ginhem gwahade po tenj hayin. Irkeb kame kun genen.

¹⁴Be, Yesu gama irde hanj marte doyan mar belen ge nin Al Kurun gusunan irnin yen hanin yerd gunaminjabe Al Kurun belen, “Kame metenj gwahade tiyyen,” yekeb basan hej momon giramin. Goyenterbe Al Kurun belen metenj goke tenbe sanjin giryin gobe nurde ha gogo. Ningeb Holu Spirityen taren ge hitte hi gobe det karim mon geb, tarenminde metenj tenj hayin.

¹⁵Be, mata gwaha tenj hayin ginen saba girhem kurun gayen pinen ma hawayin. Huginen gama irde hayin. Gogab hej henge igin hej

hiyen goyen kenen hinayin. ¹⁶Mata ten hayin, dufay hen hayin goyen gwahadeb bulun munan gwahadeb igin goyen kenkela nurde ga ten hayin. Irde al saba yirde hayin goyen manan gwahadeb bulun munan gwahadeb igin goyen kenkela nurde ga saba yirde hayin. Hayin kurun gobe gwaha po ten hayin. Gogab gigen manan go ma katayin, irde merege nurde han mar manan go ma katnayin.

Salanjen, beretapyabe meten marya doyan yird yird mata

5 ¹Be, Yesu gama irde han mar geya han goyen bana salanjen kura beken mata igin ma tike yenenbe bulun mat ma yinen ten hayin. Nanake palap irtin yara yirde bekken igin mat mere yirde hayin. Al fonen wor dadake yago gigen yirtin yara igin mat po mere yirde hayin. ²Bere salanjen wor gwahade po, momke irtin yara palap yirde bekken igin mat po mere yirde hayin. Bere fonen wor igin mat po dufay bulun hen yunenya mon, babake yago gigen yirtin yara po yirde hayin.

³Be, beretap nin momon giren tihim. Beretap kura al gore kura faran yurtek mon denya han gobe den beken daha mat faran yurtek yenbe mere sege irde gab kenkela faran yurde hinayin. ⁴Munan Al Kurun beken mata huwak yen nurde hi kurabe gahade: dirin hikeya sinsilan hen hinhan goyen wol hen taynen yago salanjen goyen faran yurde hinayin. Yesu gama irde han mar beken gwaha ten hikeb Al Kurunbe amanen wor po nurde hiyen. Ningeb beretap kura dirnen wenya abuymin wenya kura parguwak hitin han gore igin milinya abuyminya faran yurtek minyan hike yenenbe saba yirke yingen minde gore wa faran yurde hinayin.

⁵Munan beretap kura yen yunkuren po hen faran nin wor po nurdeb Al Kurun nin po heken nurde yen po gise hanke mere irde faran duri yen gusunan irde han bere gwahade go gab den beken mere sege irdeb igin faran yurde hinayin. ⁶Gega beretap kurabe gwahade mon. Yenbe megen nin mata nin po nurdeb Al Kurun nin dufay ma hen hanjen. Gobe dilin gergen han gega Al Kurun dilinde tonenbe kamtin han. Bere gwahade gobe faran yurtek mon.

⁷Momon girhem gayen doyan yirde hayen mar goyen kenkela saba yirde hayin. Gogab mel go bana al kura ulinde mere ma forok yen hiyen. ⁸Goyenpoga kuramin beken taynen ma faran yuryenbe al gobe Al Kurun nin dufaymin sanin irtin goyen pel ira yen kentek. Al Kurun ma nurd unen han mar wor dirinminmin faran yurde hanjen. Ningeb Al Kurun nurd unen hime yen hi al gore gwaha ma tiyyen gobe mataminbe Al Kurun ma nurd unen han marte mata bulun gote folek wor po.

⁹Be, beretap kura alik wor po hen al sopte yawartek mon^a goyen po gab den beken faran yurtek igin geb, denem yawarnayin. Goyenbe al

^a 5:9 Beretap gote damambe 60 mat hurkutin bere goke yitin.

yun̄kuren̄ po yawartin̄, ¹⁰irde mata igin̄ po ten̄ hike al hoyan̄ belen̄ turun̄ yirde hitin̄ beretap goyen den̄em po yawarnayin̄. Yen̄ belen̄ mata igin̄ ten̄ han̄yen kurabe dirin̄min̄ ken̄kela doyan̄ yirde han̄yen, al tin̄en̄ wake gargar yirde han̄yen, turun̄ dirnan̄ yen̄ nurdya ma alya bereya faran̄ yurde han̄yen, irde alya bereya kanduk min̄yan̄ yenen̄be faran̄ yurde han̄yen. Nin̄geb mata igin̄ kurun̄ gayen ten̄ han̄yen beretap yenen̄ gab gote den̄em po yawarayin̄.

¹¹Gega beretap kura alik wor po ma hitin̄ yenen̄be den̄em ma yawarnayin̄. Mon̄go kamebe, sopte al nin̄ dufay hen̄be, “Teban̄ al ma yawardeb Yesuyen meten̄ po ten̄ hitek,” yen̄ bin̄a tinayin̄ goyen sorkok hiyyen̄. ¹²Irkeb al hoyan̄ belen̄ goyen yenen̄be igin̄ ma nurdeb tagal yunnayin̄. ¹³Bere gwahade gobe dulin̄ hen̄ kumhaka hen̄be al tiyun̄ pasi irde hen̄be al hoyan̄ tagal yunen̄ mere kura yen̄ya yetek mon̄ goyen bana gon̄ tonan̄ hilwa hilwa ten̄be mere igin̄ mat ma ten̄ hinayin̄. Nin̄geb beretap kura alik wor po ma hitin̄be den̄em ma yawarnayin̄.

¹⁴⁻¹⁵Goyenbe mata gwahade gobe kamere nin̄ po mon̄. Beretap kurabe Yesuyen saba igin̄ goyen bikken̄ tubul ten̄be Satanyen mata bulun̄de gor katke yenen̄ himyen. Nin̄geb beretap gwahade gobe sopte al yade dirin̄ besa yirde meten̄ ten̄ dirin̄min̄ paka yirde hinayin̄ gobe igin̄ yen̄ nurde hime. Gwaha ten̄ hikeb Yesu gama irde han̄ marte asogom belen̄ gwaha mat kura mere bulun̄ mat yirtek min̄mon̄ henayin̄. Nin̄geb beretap kura ulin̄de igin̄, alik wor po ma hitin̄be den̄em ma yawarnayin̄.

¹⁶Be, beretapbe taynen̄ gore wa faran̄ yurnayin̄ yen̄ han̄kapyā yihim gwahade po, Yesu nurd untin̄ bere kura yen̄ min̄de beretap kura hikeb bere gore faran̄ yurde hinayin̄. Gwaha tikeb beretap budam po faran̄ yurd yurd kanduk gobe mun̄ kura hipirken̄ hekeb beretap al gore kura faran̄ yurtek mon̄ wor po go po gab Yesu gama irde han̄ mar belen̄ ken̄kela faran̄ yurde hinayin̄.

¹⁷⁻¹⁸Be, Al Kurun̄yen dirnen̄ wen̄ doyan̄ yird yird mar nin̄ momon̄ giren̄ tihim geb geya han̄ mar goyen saba yirde hayin̄. Al Kurun̄yen meten̄ mar faran̄ yurd yurd nin̄ Al Kurun̄yen mere asan̄de katin̄be gahade hi: “Al kura wit meten̄min̄ sak yeke meten̄de nin̄ dap̄na bulmakawmin̄ gore, ‘Faran̄ nuri,’ yen̄ meten̄min̄de tukun̄ goya, ‘Mon̄go witne niyyen̄kek,’ yen̄ mohon̄ mala ma tiyyen̄. Dap̄na gore meten̄min̄ faran̄ uryen̄ geb, tubul tike wit go nene hen̄ya meten̄ ten̄ hiyen̄,” yitin̄ hi. Mun̄an̄ mere kurabe gahade: “Meten̄ albe meten̄ ten̄ hiyen̄ gote murun̄gem ten̄ hiyen̄,” yitin̄ hi. Merebe gwahade nin̄geb, Al Kurun̄yen dirnen̄ wen̄ doyan̄ yirde han̄ mar kura belen̄ ken̄kela doyan̄ yirde mere tagalde saba yirde hike yenen̄be alya bereya gore doyan̄ marmin̄ goyen aman̄en̄ nurde yunen̄ hinayin̄. Irde yen̄ belen̄ det kuran̄ nurkeb ken̄kela faran̄ yurde hinayin̄.

¹⁹Be, al kura doyan̄ almin̄ ge igin̄ ma nurdeb yen̄ un̄kuren̄ po ge hitte wan̄, “Yen̄be mata bulun̄ tiya,” yen̄ tagal unke goya aran̄ po yende

mere ma nurayin. Al irawa ma karwo gwahade belen wan, “Mere gobe fudinde,” ginke gab kenkela min nin nankenayin. ²⁰ Irde fudinde doyan mar kura gwaha ten hike yenenbe al dilin mat, “Mata gobe igin ma ten haj!” yinen goke yinen ten hayin. Gogab meten kadam manan go yenenbe mata bulun ten ten ge kafura hen hinayin. ²¹ Irde gwaha ten henya al igin nurd unen hayin go po igin irde, bulun nurd unen hayin go bulun irde hayin gobe igin mon. Gwaha ten henya saba yirde hayin gobe go ma nurde hinayin. Goke tenbe mata goyen kenkela po ten hayin ginen Al Kurunya Yesu Kristuya miyonmin yagot dilinde mere tarej po girhem gago.

²²⁻²⁵ Be, doyan al kura gergen kerej yenbe merene gayen kenkela gama irde hayin. Be, mata kurabe al belen tike yenenbe gobe iginya bulunya goyen bebak titek. Goke tagalte mon. Gega mata kurabe yenen aranj ma bebak titek. Goyenbe go manan kamebe kawan henayin. Ningeb albe kenkela kenej ep hen gab Al Kurunyen meten al hiwi yen meten unen hayin. Munan bemel bemel ma ten hayin. Monjo yen belen kame mata bulun tikeb ge manan bulun timin yen horo tiyayin. Ningeb albe kenkela yenen gab yade hayin.

Be, Timoti, gebe garbam binderej hen hayen, irde beger bulun girde hiyen goke tenbe fe gergen po ma nen hayin. Wainbe han kayen mun kura po nen hayin.

6 ¹ Be, al kurate meten mar murungem mon dulin meten ten yunen hanjen mar goke momon giren tihim. Be, mel gore, “Doyan marnininbe Yesu ma gama irde haj. Ningeb meremin ma nurtek,” ma yen hinayin. Meremin po nurde kenkela gama yirde hinayin. Gogab doyan marminya Yesu ma gama irde haj mar belen Al Kurunyen denemya sabaminya mere bulun mat ma yirde hinayin. ² Munan meten mar kurabe doyan marmen manan Yesu gama irde haj kenem meten mar goya doyan marmen goyabe irawakde Al Kurunyen dirnen wen ningeb, Al Kurun belen tunande yenen hiyen. Gega meten mar gore bulun mat dufay henbe, “Yenya nenyaabe tunande,” yen doyan marmen goyen palap ma yirde meremin ma nurde hinayinbe igin mon. Gwaha titjenbe doyan marmen goyen meten ten yunen henya, “Doyan marninin manan nen ghade Al Kurunyen dirnen wen geb, al hoyan mon, nen ulin po,” yen nurdeb, “Meten gabe nen belen titek po ten hite,” yen wilaknen wor po nurdeya meten ten yunen hinayin. Be, mere tihim kurun gayen geya han mar goyen saba yirde mere go gama irde hinayin yen yinen tarej yirde hayin.

Al Kurunyen meten huwak po ten hayin

³ Be, al kura belen Doyan Alninin Yesu Kristu nin mere yitin gote saba fudinde goke igin ma nurde hinayin. Irde Al Kurun dilinde mata huwak

tenj tenj niŋ manan igin ma nurde Al Kurun dirnen wen goyen saba hoyan mat yirde hinayin. Al gwahade goyen yenenbe ⁴ al gobe, “Satan belen usi yirke nen nurhet nurhet tenj Al Kurunen mere go ma bebak tenya gogo hoyan mat tagalde han,” yen nurde hayin. Al gobe gwahade geb al kura mere tike min minmon mere walkaka tenj go ulinde kadam mohonde tenj hinayin. Mata gwahade goyenterbe kadam igin mat hike yenen daniŋ nen gwahade mon yen nurde awalikde ma hen nanyan tenj, bearar hende kadam besir girde tenj hinayin. ⁵ Al gwahade gobe Al Kurunen mere fudinde binde ma hikeb dufaymin bulun hitin geb, mata igin titek epte mon po henbe huginen njetnotde po hinayin. Irde Al Kurun palap ird ird matabe hora tenj tenj belnen yen nurde hinayin.

⁶⁻⁸ Be, go mar gobe hora niŋ ug po dufay hen han gega, megen niŋ detya horaya gobe kawan hitirinya goyenterbe det kura ma yade goya kawan hitirin. Nenbe kupson forok yitirin geb, kame kamde kamdere wor gwahade goyen po kamtek. Goke tenbe bindeya ulninin umna mun kura goninin yan kenenbe gog ep yen nurde hitek. Ningeb det goninin yan hen gog ep yen nurdeya Al Kurun palap ird hitek. Gogab megen hitekya goyen hen henninin igin po hitek. ⁹⁻¹⁰ Munan hora niŋ mitemitem nurde han mar gobe dufaymin gore yirkeb Al Kurun niŋ ma nurde gisaw wor po hanjen. Irkeb kanduk kurayen kurayen ulinde forok yekeb bin misin wor po nurde hanjen. Gobe, “Hora niŋ dufay kurun hekeb mata bulun kurun gor mat forok yenayin,” yen hanjen mere gote iginenbe gogo. Ningeb mere gwahade goyen po, al kurabe “Daha mat kura samuninin budam henaŋ,” yen mitemitem nurde han mar gobe ungura belen usi yirke mata bulunde katen hanjen. Al gwahade gobe gwaha kura tihit minmon tenj det gore bulunde yukutek goke po, “Daha kura tenj goninin yan hetewon,” yen mitemitem nurde hanjen. Dufay gore yirkeb mata bulunde kun hanjen.

¹¹ Munan Timoti, gebe Al Kurunen meten al geb, al gwahade gobe delge po yenen wasak tenj hayin. Irde Al Kurun palap ird dilinde huwak po hen yen ge po hekken nurde hayin. Irde Al Kurunya dirnen wenya niŋ amanen nurde yunen hayin. Irde kanduk ulger forok yen hikeb mukku ma tenj goya goya sanin po henbe bekennde igin mat mere tenj mata tenj hayin.

¹² Be, gebe Al Kurun belen yenya huginen hen hen niŋ hoy girkeb al buda kurun dilinde Yesube al gwahade yen nurde tagalarin goke Al Kurun belen amanen nuriŋ. Irdeb Yesu niŋ hekken nurde meremin po gama ird hen yen kurut wor po yen hayin goke manan Al Kurun belen amanen nuryen geb, gwahade po tenj hayin. Irde yenya huginen hen hen mata goyen tubul ma wor po tiyayin.

¹³⁻¹⁴ Be, Yesube Pontius Pailat belen gusunan irke kimin mat huwardeb yingen ge kenkelak po wol henbe, “Gigen yaha gog po,” inyin. Ningeb

ge manaj gwahade goyen po saba girhem gayen kenkela po beger kerdeb mere ulger minmon hayin. Gwaha ten hikeb kun kun Doyan Al Kuruninin Yesu Kristu mulgan hen wayyen. Munan Al Kurunyen tarendeby alya det kurun gayenyabe binfut minyan han gago. Ningeb mere girhem gabe Al Kurunya Yesu Kristuyat dilingde tarej po saba girhem. ¹⁵Yesu Kristube Al Kurun belen bikken nalu kiryin goyenterbe fudinde wor po mulgan hiyyen. Irde Al Kurun po gab al belen turun irde kasor irtek hi. Yen po gab naninyin megenya doyan yirde hi. Ningeb megen nin doyan mar karkuan tumnan yende yufuk bana han. Yende sanjibe hende wor po geb, doyan mar banare ninya kawan ninya tumnan gore epte ma tarejmin fole irnayin. ¹⁶Yen mun po gab gwahader hitin. Yenbe wukken wor po geb, megen nin al mata bulun minyan gore yen bindere epte ma kutek. Irde epte ma kenteke. Yenbe bikken wor al mali belen ma po kenej hinhan. Yenbe gwahade geb fudinde wor po yen po gab huginen turun irde hitek.

¹⁷Be, hanrapyabe hora nin ug po dufay hen hanjen mar nin tagalhem. Gega mere giren tihim gabe geya han mar kura samunmin budam han mar goke momon giren tihim. Ningeb kenkela bebak yirke nurde hinayin. Be, go mar gobe samunmin goyen yufut yunen yingen turun ma yirde hinayin. Irde det gobe daha nana hubu hiyyen gob ma nurde hite geb, “Det gore dirke keperd keperdninin igin hiyyen,” yen ma nurde hinayin. Gwahade yarabe Al Kurun belen nen megen hite mar gayen amanen nurde hinayin yen det kurun gayen dunyin geb, “Al Kurun belen po gab keperd keperdninin igin iryen,” yen nurde hinayin. ¹⁸Irde samun minyan mar goyen yinke mata igin harsonen po ten hinayin. Yenbe samunmin budam geb, mata igin manan gwahade po ten hinayin. Irde al kura det kuran nurde hike yenenbe samunmin ge be ma hen faran yurde hinayin. ¹⁹Gwaha ten hinayinbe kame Al Kurunya huginen hen henmin igin mun wor po goke gitik ten hinayinbe gogo. Gogab kame Al Kurunya huginen hen hen fudinde goyen yende wor po hiyyen.

²⁰⁻²¹Be, Timoti, al kurabe Al Kurunyen saba son hamin goyen fudinde yen nurde tagalde hanjen gobe yenen hayen gogo. Go mar gobe usi saba goyen fudinde yen nurde han. Irde megen nin mere min minmon ten han. Ningeb gebe go mar goyen delge po yenen wasak ten hayin. Irde mel gore Al Kurunyen saba bulun irnak yen saba goyen kenkela hen doyan irde hayin. Goke tenbe gogo Al Kurun belen meten gunyin geb.

Be, nebe den nin huginen Al Kurun belen buninen nurd dunen kenkela doyan dirde hiwon yen gusunan irde hime. Gog po.